

Date – 25/04/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. AH & Vety Dept chuan vawk pul hri ASF hrileng chu kumtin a zia chho telh telh tura beisei a ni, a ti.
2. Chief Minister Pu Lalduhoman Tlawng lui leh a chhehvel tifaitu Save The Riparian hruaitute tha tichak turin sorkar a inpeih reng a ti.
3. Lok Sabha Inthlan thawh hnihna atana campaign chu nimin tlai khan a tawp.



ASF

Khawlum tan leh ruahtui tlak tan tirhin ran hri chi hrang hrang a hluar thar thin angin kuminah pawh vawk pul hri African Swine Fever chuan Mizoram district thenkhat a tuam leh tawh a, AH & Vety Dept chuan ASF hrileng hi kumtin a zia chho telh telh tura beisei a ni, a ti. Nimin khan AH & Vety Department Pu C. Lalsawivunga hovin Department Officer ten a Office Chamberah African Swine Fever chungchang a Mizoram dinhmun leh hmalak dan tur an sawi ho .

Heta tarlan anih dan chuan African Swine Fever hi kum 2021 ah Mizoram a lutchilh tan a, he natna hian state chung a chen chilh tawh a, amaherawhchu hri len hmasak ber ai chuan vawk thi leh suatte pawh a tlem chho tial tial a, hetihlai hian hmun thenkhatah hri hi a lanchhuah leh thin avangin ranvulh tute tawrhna a thleng thin a ni.

Kum 2021a ASF hrileng nemnggeh anih hnuah reh taktak thei lovin kum 2022, 2023 leh 2024 ah te pawh report hi a awm chho zel a. Tunhnai a leng thar anga lang hi nikum 2023 May thla atang khan thla tin thi report hi a awm chhunzawm zel a ni tih Vety Dept hotute chuan an sawi a ni.

Pu Sawivunga chuan Mizoram chu sa a intodelh turin Department in nasa takin hma a la meka, hetihlaia African Swine Fever a leng leh thin chu pawh a tih thu a sawi a, Department a thawktu officerte theihtawp chhuah zel tura sawmin, ASF beihpui thlak naah hian mipuite tha taka Department hmalaknate tawiawm a, Sorkar dan te zawm hram hram turin a chah bawh ani.

ASF hi a enkawlina damdawi a awmluh avangin fimkhur chu invenna tha ber a ni a, Ran In intlawhpawhloh, ran damlo leh sate zawrh chhuah loh, ran thite thuk taka phum that, ran in leh a vel damdawi nen a tih thianghlim fo tur a ni.

He meeting hian mipui hnena a thara inzirtirna thatak neih leh ni se tiin a rel.

Hriat theih chinah ASF hi Aizawl, Champhai leh Saitual ah te a leng tih nemngheh tawh a ni a, tunhnaiah vawi 174 vel a thi a report a ni bawh a ni.

(CORR)

<><><>

CM

Chief Minister Pu Lalduhoma chuan tunhnaia luidung thenfai hna thawk mek tu Save The Riparian hruaitute chu a pisaah kawmin an mamawha hman tur sum, cheng nuai 2 a hlan.

Chief Minister chuan Save The Riparian pawl hmalakna chu ropui a tih thu sawiin lawmthu a hrilh a, an tha tichak turin sorkar a inpeih reng tih a hrilh bawk a. Chief Minister chuan Mizorama lui te an lo thianghlim a, tui thianghlim Mizoramin a neih reng theihnana Save The Riparian te hmalakna tha taka thlawp turin Mizoram mipuite a sawm a ni.

><><>

KOLASIB WORLD TB DAY

Kolasib District chhunga TB awmlohna Village Council 14 te hnenah nimin khan lawmpuina thilpek hlan a ni a,

Nimin khan Kolasib-a I&PR Conference Hall-ah World Tuberculosis Day hman a ni a, DC Pu John LT Sanga chuan a hmanpui a. He hunah hian Pu R.Lalrammuana, Supervisor, DOT Plus TB HIV chuan TB natna, a lan chhuah dan leh enkawl na kalpui dan a tarlang a. Village Council-te TB Free Village a puan theih tur a tehfung hrang hrangte tarlan niin TB natna avanga enkawl mek ten eitur tha an dawn theih nan a duh apiang tan Nikshay Mitra kaltlangin, tanpuina thla 6 chhung, thla tin 700 an pek theih thu a sawi a. Deputy Commissioner, Kolasib pawh hian vawiin hian TB natna veite tanpui nan Nikshay Mitra ni turin Sr. CMO Dr. RK Lalthlamuana hnen ah tanpuina a hlan nghal bawk a ni.

Kolasib district a Village council 56 zingah nimin khan Thingdawl RD block hnuai a Village Council paruk, Zanlawn, Serkhan, N.Chaltlang-I, N.Chaltlang- II, Bukpui leh Thingthelh VC te chu TB Free Village ah puan an ni a. Bilkhawthlir RD block hnuai a Village Council pariat, Buhchangphai, Saihapui K, Pangbalkawn, Meidum, Phaisen, Saihapui V, N.Chawnpui leh Saipum VC te chu TB Free Village ah puan an ni. Kolasib district chhung a Village Council dangte pawh TB Free Village-a puan an nih thuai theih nan hmalak mek a ni bawk.

<><><>

KHAWZAWL BLOOD DONATION

Khawzawl Vengthar Branch YMA in an Branch kum 50 tlin lawmna an neih mekah nimin khan a thlawn a thisen pek runpui an buatsaih a, thisen unit 74 an pe.

Thisen pek runpui ah hian Champhai District Hospital Blood Bank atangin Dr. Lalnuntluanga hovin mi 8 an thawk chhuak a. Vengthar YMA Member te bakah Khawzawl khawpui chhung veng dang atangte in mi tlawmngaite an thawk chhuak a, thisen petute hi mipa 60 leh hmeichhia 14 an ni.

Khawzawl Vengthar Branch YMA hian an Branch Golden Jubilee lawmna pual hian kumtir atangin kumin kum tawp thleng hian Programme an buatsaih dawn a, Marathon Race te, Mizo infiamna hmanga intihsiakna te, YMA Chhang Sports te an buatsaih tawh a ni.

(PR)

<><><>

PROJECT WASTE MEDICINE

District Urban Development Office, Kolasib leh Govt C. Zakhuma Higher Secondary School, Eco Club tangkawp buatsaih 'Project: Waste Free Kolasib' nimin khan hawn a ni a, Govt. CZ HSS Eco Club te hian Kolasib Tui lakna Tuichhuahen fintu Tuilut lui hnar an thianfai a ni.

Govt. CZ HSS hian nikum khan Tuichhuahen fintu lui hnar thenfai hna hi an thawk tawh a. Bawlhhlawh Bag 100 zet an lo paih tawh a. Kumin ah a aia nasa zawk a hmalak tumin Eco Club ten ruahmanna an siam a. An ruahman dan chuan Bawlhhlawh hi bag 200 tal thenfai an tum a. School naupang 150 vel bakah Zirtirtu mi 20 an thawk chhuak a ni.

Govt. CZ HSS Principal Pu Lalnghilhlova Chinzah, Principal kaihhruai a 'Project: Waste Free Kolasib' vailiamna hun ah hian Kolasib DC Pu John LT Sanga chuan CZ HSS Eco Club te hmalakna chu thil ropui tak nia a hriat thu a sawi a. He an hmalakna hian Kolasib khawpui faina kawngah, veng chhung, mimal faina lama kan inenkawlina ah thu ropui tak a sawi a rin thu, a sawi. Zirlaite leh Zirtirtuten Office pawimawh tak nen a thawk ho a, khawtlang tihfai hna, kan tui in tur hnar tihfai hna thawk tura an pen chhuahna chuan thangkawk ring tak a siam zel a beisei thu a sawi bawk a ni.

<><><>

MLP ACT

March thla chhung a MLP Act,2019 dan bawh chhia zu zuar mi 529 man an ni a, zu rui mi 53 man an ni bawk. MLP Act 2019 dan bawhchhia mantu te hi Excise & Narcotics Department leh Mizoram Police Department te an ni.

MLP Act dan phal loh zu tawlh ruk thahnem tak March thla chhung khan man a ni a, heng zingah hian rakzu liters 7000 chuang leh zu bilhlai tin 5000 chuang man anih bakah dawidim kg 1 man tel a ni bawk. India ram siam zu, Mizorama dan phal loh a tawlh ruk tum zu bottle 7000 chuang leh beer cans 2000 chuang man tel a ni. March thla chhung vek hian ram pawn zu siam litter 400 chuang leh beer cans 1500 chuang bakah foreign wine bottle 1000 chuang man a ni. Heng zu man bakah hian zu sakna bel 34 leh zu phurh nan a hman motor 26 man tel a ni bawk.

<><><>

LS ELECTION

Lok Sabha Inthlan thawh hnihna atana campaign chu nimin tlai khan a tawp. Inthlan hi State leh Union Territory 13-a Lok Sabha seat 88-ah neih a ni dawn a, Outer Manipur Lok Sabha bial pawh a tel.

He phase atan hian naktukah vote thlak a ni ang a, Madhya Pradesh-a Betul (ST) Parliamentary Constituency-a thawh hnihna neih tura ruahman chu tunah chuan BSP Candidate boral vangin thawh thumnaah vote thlak turin ruahman that a ni.

He phase-ah hian State leh UT 13 atangin candidate 1,198 bakah Outer Manipur Lok Sabha bial atangin candidate pali an awm a ni

<><><>

QATAR EMIR

Qatar Emir, Sheikh Tamim Bin Hamad Al-Thani chu ni hnih chhung Nepal rama state visit a neih zawh hnuah nimin khan a haw a.

Qatar Emir hian President Paudel-a sawmna angin Thawhlejni khan Nepal a thleng a. Prime Minister Pushpa Kamal Dahal leh Qatar Emir Al Thani te chu nimin khan inbiain inbiakpawhna, infiamna, science leh technology, industry, leh sumdawmna chungchanga inremna leh inthleng dan an sawi a ni.

Nimin khan Nepal President Ramchandra Paudel hian Qatar Amir hi Tribhuvan International Airport (TIA) ah a thlah a, Vice President Ram Sahay Prasad Yadav, Prime Minister Pushpa Kamal Dahal ‘Prachanda’, Speaker Devraj Ghimire, Deputy Prime Minister leh Minister for Foreign Affairs Narayan Kaji Shrestha, Deputy Prime Minister leh Minister for Physical Infrastructure te pawh an tel bawk.

Nepali Army contingent pakhat chuan guard of honor an hlan a, he hunah hian cannon salvo 21 an kap bawk.

<><><>